



REPUBLIKA E SHQIPËRISË
BASHKIA KORÇË
KRYETARI

Nr. 4426 prot.

Korçë, më 24.06.2020.

URDHËR
Nr. 398 Datë 24.06.2020

PËR MIRATIMIN E RREGULLORES “PËR MARRJEN E MASAVE ORGANIZATIVE PËR USHTRIMIN E VEPRIMTARISË SË BASHKISË KORÇË GJATË GJENDJES SË EPIDEMISË SË SHKAKTUAR NGA COVID-19”

Bazuar në nenin 64 “Kompetencat dhe detyrat e Kryetarit” të ligjit 139/2015 “Për vetëqeverisjen vendore”, datë 17.12.2015, ligjin nr. 44/2015 “Kodi i Procedurave Administrative”

URDHËROJ:

1. Miratimin e rregullores “për marrjen e masave organizative për ushtrimin e veprimtarisë së Bashkisë Korçë gjatë gjendjes së epidemisë së shkaktuar nga COVID-19”, sipas tekstit bashkëlidhur këtij urdhëri.
2. Kjo rregullore është e vlefshme deri në përfundimin e gjendjes së epidemisë së shkaktuar nga COVID-19 dhe mund të plotësohet ose të ndryshohet në raport me vijueshmërinë e saj.
3. Për zbatimin e këtij urdhëri ngarkohen të gjitha Drejtoritë, Rajonet dhe Njësitë Administrative pranë Bashkisë Korçë.
4. Ky urdhër hyn në fuqi menjëherë.

KRYETARI I BASHKISË
Sotiraq Filo



RREGULLORE “ PËR MARRJEN E MASAVE ORGANIZATIVE PËR USHTRIMIN E VEPRIMTARISË SË BASHKISË KORÇË GJATË GJENDJES SË EPIDEMISË SË SHKAKTUAR NGA COVID-19”

Neni 1

DISPOZITA TË PËRGJITHSHME

1. Qëllimi i kësaj rregulloreje është organizimi dhe funksionimi i punës në Bashkinë Korçë, për të garantuar vijimësinë e punës dhe kushte të përshtatshme për reduktimin e transmetimit të COVID-19.
2. Objekti i kësaj rregulloreje është përcaktimi i rregullave, procedurave standarde të punës të harmonizuara, në përputhje me udhëzimet e dhëna nga Instituti i Shëndetit Publik dhe Organizata Botërore e Shëndetësisë.
3. Bashkia Korçë brenda juridiksionit dhe fushës së saj të veprimit duhet të sigurojë funksionimin normal të institucionit dhe kryerjen e rregullt të të gjitha veprimtarive institucionale, duke garantuar zbatimin e masave dhe udhëzimeve të sigurisë të rekomanduara nga Instituti i Shëndetit Publik dhe nga kjo rregullore.

Neni 2

ORGANIZIMI I PUNËS NË INSTITUCION GJATË PËRIUDHËS SË GJENDJES SË EPIDEMISË

1. Gjatë periudhës së gjendjes së epidemisë, drejtoritë pranë Bashkisë Korçë duhet të realizojnë veprimtarinë e tyre nëpërmjet kombinimit të punës në ambientet e institucionit dhe punës në distancë.
2. Nëpunësit/punonjësit që do të kryejnë detyrat në ambientet e institucionit, duhet të respektojnë rregullat e zakonshme për realizimin e detyrave të tyre funksionale si dhe rregullat e përcaktuara nga Instituti i Shëndetit Publik dhe në nenet në vijim të kësaj rregulloreje.

Neni 3

OFRIMI I SHËRBIMEVE NDAJ PUBLIKUT

1. Të gjitha drejtoritë, rajonet dhe njësitë administrative pranë Bashkisë Korçë duhet të garantojnë ofrimin e shërbimeve ndaj publikut gjatë gjendjes së epidemisë së shkaktuar nga COVID-19, duke hartuar një plan masash për të minimizuar kontaktin midis qytetarëve dhe nëpunësve/punonjësve dhe për të shmangur grumbullimin e tyre në sportele apo ambiente të tjera të brendshme.
2. Plani i masave duhet të përfshijë rastet e ofrimit të shërbimeve online, duke shfrytëzuar përdorimin e mjeteve të komunikimit elektronik për të nxitur qytetarët të përdorin platform online të ofrimit të shërbimeve apo marrjes së informacionit, etj.

3. Për shërbimet për të cilat nevojitet kontakt i drejtpërdrejtë me publikun, nëpunësit/punonjësit duhet të pajisen me mjete pune mbrojtëse me qëllim ruajtjen e shëndetit të tyre dhe minimizimin e trasmetimit të COVID-19. Në këtë rast, vlerësohet e nevojshme të instalohen barriera fizike transparente që sigurojnë distancimin fizik ndërmjet nëpunësit/punonjësit dhe qytetarit, si dhe sinjalistika e nevojshme që tregon vendprijtet në distancë.
4. Në ambientet që përdoren për pritjen e publikut duhet të shmanget mbipopullimi e të sigurohet ventilimi/ajrimi i shpeshtë.
5. Drejtoritë të cilat ofrojnë shërbim për publikun në sportel duhet të zbatojnë udhëzimet e Institutit të Shëndetit Publik për ndalimin e përhapjes së COVID-19.

Neni 4

PUNA NË TERREN

1. Nëpunësit/punonjësit e Bashkisë Korçë duhet të respektojnë rregullat e distancimit fizik dhe të përdorin mjetet e tjera mbrojtëse gjatë udhëtimit dhe punës në terren.
2. Për nëpunësit/punonjësit e Bashkisë Korçë të cilët duhet të kryejnë detyra të tyre në terren, gjatë kohës kur transporti publik nuk është funksional, transporti i tyre të organizohet me makinat e institucionit, apo mes kolegëve me makinat e tyre personale, por përseri duke respektuar rregullat e distancimit dhe higjenës personale.

Neni 5

MINIMIZIMI I RISKUT TË INFEKTIMIT NGA COVID-19 GJATË MBLEDHJEVE

1. Nëpunësit/punonjësit brenda të njëjtit institucion ose grupet ndërinstitucionale udhëzohen t'i zhvillojnë mbledhjet e tyre ose aktivitetet e tjera të kësaj natyre, të tilla si: konferenca, seminare, trajnime profesionale etj., duke përdorur platformën e komunikimit online Webex Meeting (video konferencë).
2. Nëse nga organizatorët e mbledhjes vlerësohet se është i nevojshëm takimi ballë për ballë, i cili nuk mund të zëvendësohet nga një video konferencë, atëherë përpara organizimit të mbledhjes duhet të merren masat e nevojshme për minimizimin e rrezikut të infektimit nga COVID-19, e konkretisht:
 - a) Të vlerësohet nëse mund të reduktohet numri i pjesëmarrësve në mbledhje;
 - b) T'i referohen këshillave të autoriteteve kompetente shëndetësore për organizimin e mbledhjeve;
 - c) Të këshillohen paraprakisht pjesëmarrësit, që nëse nuk ndjehen mirë ose nëse kanë simptoma të ngjashme me ato të infektimit nga COVID-19 të mos bëhen pjesë e mbledhjes;
 - ç) Të garantohen materialet e nevojshme higjeno-sanitare, si: sapun i duarve, dezinfektantët me bazë alkooli që kanë të paktën 60% alkool, letër të pastrimit të

duarve ose peshqir me një përdorim për pastrimin e sipërfaqeve, maska mbrojtëse, kosha të mbyllur për eliminimin e mbetjeve;

d) Të sigurohen që të kenë kontaktet e të gjithë pjesëmarrësve, si: numër telefoni, email dhe adresa ku ata janë duke qëndruar. Të informohen pjesëmarrësit se të dhënat e tyre do t'i përcillen autoriteteve të shëndetit publik, nëse ndonjë prej tyre preket nga sëmundja infektive COVID-19. Nëse ata nuk do të pajtohen me kushtet e mësipërme, atëherë nuk mund të marrin pjesë në mbledhje;

dh) Të përcaktohen vendet ku do të ulen pjesëmarrësit në mënyrë që të ruhet distanca prej së pak 2 metra nga njëri-tjetri;

e) Të përcaktohet një masë gadishmërie, nëse ndonjë nga pjesëmarrësit nuk ndjehet mire gjatë takimit ose shfaq simptoma të infektimit të mundshëm.

3. Gjatë zhvillimit të mbledhjes, organizatorët duhet të:

a) Udhëzojnë pjesëmarrësit për larjen e rregullt të duarve ose përdorimin e një dezinfektanti me bazë alkooli;

b) Sigurojnë që pjesëmarrësit në takim të përdorin maska dhe t'i udhëzojnë ata të mbulojnë fytyrën e tyre me këndin e bërrylit ose një pecetë njëpërdorimëshe nëse kolliten ose teshtijnë;

c) Orientojnë pjesëmarrësit për këshillat dhe informacionin e nevojshëm të kujdesit shëndetësor;

ç) Marrin masa për ajrosjen e herëpashershme të ambientit ku po zhvillohet mbledhje, duke aktivizuar dhe sistemet e ventilimit;

d) Ndjekin planin e gadishmërisë ose të kontaktojnë autoritetet kompetente të shëndetit publik, nëse ndonjë nga pjesëmarrësit nuk ndjehet mirë gjatë takimit ose ka simptoma të infektimit të mundshëm.

4. Me qëllim menaxhimit me efektivitet të riskut të infektimit nga COVID-19, në rastet e mbledhjeve të zhvilluara në sallë, organizatorët duhet të:

a) Mbajnë shënim emrat dhe kontaktet e pjesëmarrësve për të paktën një muaj.

b) Njoftojnë të gjithë pjesëmarrësit nëse dikush në mbledhje është izoluar si rast i dyshuar me COVID-19.

Neni 6

SIGURIMI I KUSHTEVE TË DUHURA HIGJENO-SANITARE NË MJEDISËT E PUNËS

1. Në përputhje me udhëzimet e dhëna nga Instituti i Shëndetit Publik, duhet të sigurohen kushtet e duhura higjieno-sanitare, me qëllim kufizimin e përhapjes së COVID-19 në mjediset e punës. Për këtë Bashkia Korçë duhet të marrë masa për:

a) Sigurimin e vazhdueshëm të elementëve të higjenës ku përfshihen: sapun i duarve, dezinfektantët me bazë alkooli që kanë të paktën 60 përqind alkool, letër të pastrimit të duarve ose peshqir me një përdorim për pastrimin e sipërfaqeve dhe koshat e mbyllur për eliminimin e mbetjeve;

- b) Pastrimin e vazhdueshëm të sipërfaqeve dhe elementëve të tjerë të vendit të punës. Është e nevojshme që produktet dezifektuese të kenë përqindjen, metodën e aplikimit dhe kohën e kontaktit të saktë, si dhe përdorimi i tyre duhet bërë duke përdorur mjetet e mbrojtjes personale;
 - c) Dezifektimin e mjedisit të punës, pastrimin përpara hapjes dhe pas mbylljes së procesit të punës, sidomos të tavolinave, telefonave, tastierave të kompjuterave dhe çdo hapësire ku ka patur kontakt me duar, si dhe ajrimin minimalisht 3 (tri) herë në ditë;
 - ç) Pastrimin e korridoreve çdo 2 (dy) orë;
 - d) Pastrimin dhe dezifektimin e tualeteve çdo 30 minuta;
 - dh) Pastrimin dhe dezifektimin çdo 30 minuta të dorezave të dyerve të çdo zyre dhe mjedisi pune, si dhe parmakët e shkallëve;
 - e) Dezifektimin 2 herë në ditë të ashensorëve;
 - ë) Njoftimin menjëherë të NJVKSH-së dhe mjekut përkatës të familjes, nëse ka një rast të dyshuar me COVID-19 në institucion.
2. Me qëllim informimin e nëpunësve/punonjësve të institucionit, por edhe qytetarëve/vizitorëve në institucion, duhen të merren masa për të:
- a) Vendosur në vend të dukshëm rregulloren mbi tërësinë e masave të minimizimit të trasmetimit të COVID-19;
 - b) Vendosur në mjediset e institucionit kartela informuese (mundësisht me imazhe ilustruese) mbi rregullat e higjenës, simptomat paralajmëruese të infektimit të mundshëm nga COVID-19 dhe masat që duhen marrë në një rast të tillë, etj;
 - c) Publikuar në hyrje të institucionit dhe faqet e tyre zyrtare të internetit, rregullat e reja të vendosura për ofrimin e shërbimeve, në kuadër të masave për parandalimin e përhapjes së infeksionit të shkaktuar nga COVID-19.
3. Nëpunësit/punonjësit e Bashkisë Korçë duhet të zbatojnë rregullat e mëposhtme:
- a) Të aplikojnë larjen e duarve dhe/ose përdorimin e dezifektantëve;
 - b) Të mos përdorin mjetet e njëri-tjetrit dhe postet e ndërsjellta të punës (përfshihen rastet kur është i nevojshëm një veprim i tillë);
 - c) Të respektojnë praktikën e etiketës respiratore, kollitjes e teshtitjes;
 - ç) Të respektojnë masat e distancimit social dhe fizik duke ruajtur distancën të paktën 2 (dy) metra nga njëri-tjetri;
 - d) Të vendosin maska mbrojtëse të cilat duhet të lahen në 60 gradë dhe të heqosen, si dhe të përdorin shami letre për higjenën e hundëve;
 - dh) Nëse në institucion një nga nëpunësit/punonjësit është apo ka pasur kontakte të ngushtë me një person pozitiv me COVID-19, ai duhet të qëndrojë në vetëkarantinim dhe të njoftojë mjekun e familjes dhe drejtuesin e institucionit;
 - e) Nëpunësit/punonjësit që kanë shenja klinike duhet të qëndrojnë në shtëpi, të vetëkarantinohen, të njoftojnë eprorin direkt, të monitorojnë shenjat klinike dhe për çdo shqetësim të njoftojnë mjekun e familjes ose numrin 127 të urgjencës.
4. Nuk lejohet hyrja në institucion e qytetarëve/vizitorëve pa maskë.

Neni 7
DISPOZITA TË FUNDIT

1. Rregullorja për marrjen e masave organizative për ushtrimin e veprimtarisë institucionale duhet të jetë e afishuar në faqen zyrtare të Bashkisë Korçë dhe t'u vihet në dispozicion nëpërmjet email-it të gjithë nëpunësve/punonjësve të institucionit.
2. Drejtoria e Burimeve Njerëzore Protokoll-Arkiva dhe Shërbimeve Mbështetëse është përgjegjëse për mbikqyrjen e zbatimit të përcaktimeve të kësaj rregulloreje.
3. Zbatimi i masave të rregullores do të jetë subjekt inspektimi sistemati nga Inspektoriati Shtetëror Shëndetësor përkundrejt penaliteteve në fuqi.